

## Celebrade a Tarcint la 47<sup>e</sup> Fieste de Patrie dal Friûl

Fieste grande e tant public intun dai lûcs simbolicis de identitât furlane

Un cîl celest, come la bandiere dal Friûl, e un soreli aur, come la sô acuire, a àn compagnât une edizion plene di int de Fieste de Patrie dal Friûl, la numar 47, ospitade a Tarcint domenie ai 7 di Avrîl.

L'event – inmaneât chest an dal Comun di Tarcint, de Regjon Autonome Friûl-Vignesie Julie e de Agenzie regjonâl pe lenghe furlane - ARLeF, in colaborazion cul Istitût Ladin Furlan "Pre Checo Placerean" - al è stât screât cu lis autoritâts che a àn puartât un omaç floreâl al monument in memorie di Chino Ermacora, sul cuei di Sante Eufemie a Segnà. Rivadis po in place Libertât, a àn assistût ae esposizion de bandiere dal Friûl, compagnade de Bande musicâl dai ex alpini di Cuie che e à sunât "Incuntri al doman", l'Imni dal Friûl. Dopo di chest, il corteu al è lât bande il Domo, là che e je stade dite messe par furlan, compagnade dal Côr "San Pietro Apostolo", cun leturis e preieris ancje in lenghe slovene e todescje. Finide la funzion, si à esibît il Grup folcloristic "Chino Ermacora". Dopo vê dât acet ae delegazion dai cicloturiscj de FIAB regjonâl, i presints si son spostâts inte sale Margherita pes celebrazions civîi, cul Imni dal Friûl, la leture de Bole imperiâl e il tradizional scambi de bandiere tra il Comun di Caprive e il Comun di Tarcint. Po dopo, al è stât proietât il gnûf video dal canâl YouTube in lenghe furlane, YouPalTubo, [La bandiere furlane tal spazi](#), là che si conte la storie incredibile dal astronoute di divignince furlane, Gregory Thomas Linteris, che al veve puartade daûr la bandiere dal Friûl tal spazi. Pe ocasion e jere presente ancje Desiree Chiappo Debegnach, la youtuber che e à contât cheste storie, e il protagonist de aventure "spaziâl", midiant di un videomessaç. Par sierâ la buinore, la esibizion de sopran Maria Giovanna Michellini, compagnade de arpe di Serena Vizzutti.

A Tarcint e jere presente une delegazion numerose di sindics e di rapresentants dal territori di lenghe furlane, che a àn vût il bon acet dal paron di cjase, il sindic di Tarcint Mauro Steccati. Vie pe cerimonie civîl, insieme a lui a àn puartât il lôr salût Geremia Gomboso, president dal Istitût Ladin Furlan, Walter Bandelj, president de SSO Svet slovenskih organizacij e Raimondo Domenig, vice president dal KKV Kanaltaler Kulturverein (chestis dôs ultimis presincis a confermin, ancjemò une volte, che la Fieste e je un moment impuartant par celebrâ il valôr e la ricjece dal plurilinguism de nestre regjon); Claudio Violino, vice president de ACLiF - Assemblee de Comunitât linguistiche furlane; Dorino Favot, president de ANCI FVG - Associazione nazional comunis talians; Federico Vicario, rapresentant de Universitât dal Friûl e president de Societât Filologicje Furlane; Eros Cisilino, president de ARLeF - Agenzie regjonâl pe lenghe furlane; l'on. Emanuele Loperfido; (in videomessaç) Pierpaolo Roberti, assessôr regjonâl aes autonomiis locâls; Barbara Zilli, assessore regjonâl aes finansis.

### INFORMAZIONS PE STAMPE - INFORMAZIONI PER LA STAMPA

**Ufficio Stampa ARLeF** CALT relazioni pubbliche / e-mail: [arlef@caltpr.it](mailto:arlef@caltpr.it)

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<<

A jerin presints ancje il sindic di Udin, Alberto Felice De Toni cu la conseire delegade, Stefania Garlatti-Costa; Maurizio Negro, assessôr dal Comun di Gurize; Paola De Giorgi, conseire delegade dal Comun di Pordenon.

**L'assessôr regjonâl aes autonomiis locâls, Pierpaolo Roberti**, che nol à podût jessi presint, al è intervignût cuntun videomessaç par augurâ a ducj une buine Fieste de Patrie dal Friûl. *«Chest – al à declarât - al è il moment par rifleti sul stât di salût des nestris lenghis minoritariis. In chescj agns, in graciis dal supuart decisîf e fundamentâl de ARLeF, la Aministrazion regjonâl e à fat tant, rivant a tocjâ risultâts impuartants. O pensi al Plan gjenerâl di politiche linguistiche atuâl, ae istituzion dal Teatri stabil furlan, ae convenzion cu la Rai che e à zontât pe prime volte programs in lenghe furlane. Però al è ancje il moment par cjalâ indenant e viodi ce che al è di fâ. Tacant propit de Rai, che e à une ufierte ancjemò no suficiente. Fin al prossim plan di politiche linguistiche, che al varà di fâ altri pas indenant par pandi un messaç impuartant: cuant che o fevelin di furlan no fevelin di une lenghe che e à di jessi doprade dome a cjase, ma di une lenghe veicolâr di doprâ dapardut».*

**La assessore regjonâl aes financis, Barbara Zilli**, e à marcât: *«La Fieste de Patrie dal Friûl, e rapresente un moment impuartant par rinovâ e tignî vîf l'impegn e la braûre di apartignî ae comunitât furlane. Il nestri al è un popul che al à lidrîs fondis e lontanis tal timp, fatis di valôrs e di principis, di culture e di identitât che a son rivadis fin a nô cu la fuarce dai nestris paris e che vuê o vin di atualizâ e infuartî par cjalâ l'avignî. In chest moment particolâr de nestre storie, tignî un voli su lis lidrîs e tornâ a scuvierzilis al è une maniere par no pierdi il troi e no fâlu pierdi nancje ai zovins. Il popul furlan al è fuart de sô storie, al è braurôs des sôs tradizions e al scuen cjatâ plui cûr propit de sô culture, dai valôrs sempliçs che tal timp a àn dât forme a une comunitât buine di tornâ impins dopo jessi colade ancje tai moments plui neris. O vin un imprest maraveôs par contâ dut chest e par vivi ad implen la nestre furlanetât: la nestre marilenghe».*

Al à fevelât ancje l'on. **Emanuele Loperfido** che al à ripuartât che, intun intervent in Parlament, al à citât il 3 di Avrîl e il so valôr. Puartant il Friûl tant che esempi di coesistenza pacifiche tra identitâts diferentis. Par sierâ, si è fat partevôs des istancis dal furlan.

Il **sindic di Tarcint, Mauro Steccati** al à viert il so discors fasint i compliments e ringraziant ducj chei che, a cualsei titul, a àn colaborât tal organizâ l'event. Al à ancje zontât di sintîsi *«onorât e braurôs di dâ acet in maniere ideâl a dut il popul furlan in chest lûc che al à dât al Friûl tantis personalitâts impuartantis, che a àn contribuît in maniere significative ae nestre storie. L'auguri al è che cheste zornade e sedi une ocasion par fâsi cualchi domande, rifleti su la nestre realtât e su cemût che o volaressin che e fos vivude la nestre specialitât, resonant su la nestre contemporaneitât».* Sierant il discors, al à fevelât dai zovins: *«O scugnìn passâ aes gnovis gjenerazions chest patrimoni».*

#### INFORMAZIONS PE STAMPE - INFORMAZIONI PER LA STAMPA

**Ufficio Stampa ARLeF** CALT relazioni pubbliche / e-mail: [arlef@caltpr.it](mailto:arlef@caltpr.it)

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<<

Il **president de ARLeF, Eros Cisilino**, al à ricuardât che Tarcint al è un dai lûcs simbul de identitât furlane, stant che e je la citât di Chino Ermacora, che e à dât acet ae ativitât di pre Duili Cuarnâl e che tra i siei citadins e à ancje Giorgio Jus, tra i fondadôrs dal Moviment Friûl e pari dal adatament che, tai agns '70, al è stât fat ae bandiere che vuê e je il simbul par ecelence dai furlans par dut il mont. Il president al à ancje marcât la impuartance des gnovis gjenerazions par prudelâ la lenghe furlane: *«La Fieste de Patrie dal Friûl di chest an si è mostrade pal so caratar propositîf, so redut te suaze di dutis lis manifestazions colaterâls (che a àn tocjât un gnûf record come numar). Mi plâs dâ evidence so redut a ce che al è stât fat par cjapâ dentri i plui zovins. A son simpri di plui i fantats e lis fantatis che, in maniere diferente, si mostrin atîfs te tutele dal furlan. Chest al è cence dubi il risultât di une ativitât di squadre e dal lavôr fat ogni dì su plui nivei. Par chest, o crôt che la strade che o vin cjapât e sedi chê juste, ancje se i obietîfs ancjemò di tocjâ sigûr no mancjin»*.

**Geremia Gomboso, president dal Istitût Ladin Furlan “Pre Checo Placerean”** al è tornât suntun argoment che i ten in maniere particolâr: *«E covente une gjestion plui autonome de scuele. Chest al permetarès di strutturâ un plan di studis par insegnâ la nestre storie. No ultin, al è urgjent che il furlan al sedi insegnât in forme curicolâr ancje tes scuelis mediis, là che invece l'insegnament si fâs par progjets singui»*. Gomboso al à marcât ancje la delusion par vê macjade la aprovazion dal messâl roman in lenghe furlane. Sierant, al à dât evidence di trop che a son impuartantis lis relazions, simpri plui buinis, fra lis minorancis linguistichis de regjon, furlane, slovene e todescje, che a lavorin adun fasint squadre: *«Al è l'esempli che o sin Europe»*.

Pe **ACLIF - Assemblee de Comunitât Linguistiche Furlane** al è intervignût il vice president **Claudio Violino** che al à ricuardade la impuartance de Fieste, marcant so redut la dibisugne di cjalâ bande l'avignî. Il president **Daniele Sergon**, che nol à podût jessi presint, intune note al à marcât la impuartance de unitât identitarie furlane: *«Ce che o vin di tignî cont, dal spirt di cheste Fieste, e je ancje une unitât di intenzions. Se o restin dongje in chest moment, o podìn fâ valê i nestris dirits su temis une vore impuartants come chel dal furlan in Rai, e in particolâr sul telegjornâl serâl par furlan; ma ancje su la autonomie decisionâl te scuele, par tutelâ e valorizâ il furlan»*.

Dopo dal gustâ, il program de Fieste al è lâat indenant tal dopodimisdî, dant aes personis rivadis a Tarcint la pussibilitât di gjoldi dai itineraris culturâi di Palaç Frangipane.

Tarcint, ai 7 di Avrîl dal 2024

#### INFORMAZIONS PE STAMPE - INFORMAZIONI PER LA STAMPA

**Ufficio Stampa ARLeF** CALT relazioni pubbliche / e-mail: [arlef@caltpr.it](mailto:arlef@caltpr.it)

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<<